

Засгийн газрын 2004 оны 236 дугаар
тогтоолын 6 дугаар хавсралт

ҮЙЛДВЭР, ХУДАЛДААНЫ ЯАМНЫ ҮЙЛ АЖИЛЛАГААНЫ
СТРАТЕГИ, ЗОХИОН БАЙГУУЛАЛТЫН БҮТЦИЙН
ӨӨРЧЛӨЛТИЙН ХӨТӨЛБӨР

1. Нийтлэг үндэслэл

1.1. Оршил

Үйлдвэр, худалдааны яамны үйл ажиллагааны стратеги, зохион байгуулалтын бүтцийн өөрчлөлтийн хөтөлбөр /цаашид “хөтөлбөр” гэх/-т Үйлдвэр, худалдааны сайдын болон Засгийн газрын Танхимын шийдвэрийг боловсруулан гаргах, хэрэгжүүлэхэд дэмжлэг үзүүлэхэд чиглэсэн стратегийн төлөвлөлт, бодлого боловсруулах, бодлогын хэрэгжилтийг зохицуулах, төрийн захиргааны удирдлага, зохицуулалтаар хангах, бодлогын хэрэгжилтэд хяналт-шинжилгээ хийх, үр дүнд нь үнэлгээ өгөх асуудлыг хамарсан Үйлдвэр, худалдааны яамны үйл ажиллагааны стратегийн болон бүтцийн загварыг тодорхойлов.

1.2. Үндэслэл

Хөтөлбөрийг боловсруулахдаа Улсын Их Хурлын 1996 оны 38 дугаар тогтоолоор зөвшөөрсөн “Монгол Улсын төрөөс Засгийн газрын үйл ажиллагааны чиглэл, бүтцийн ерөнхий тогтолцооны өөрчлөлт, шинэчлэлийн талаар баримтлах бодлого”-ын баримт бичиг, Засгийн газрын бүтцийн тухай хууль, Засгийн газрын тухай хууль, Яамны эрх зүйн байдлын тухай хуулийг тус тус үндэслэв.

1.3. Хууль тогтоомжийн орчин

Хөтөлбөрийг дор дурдсан хууль тогтоомжийн хүрээнд хэрэгжүүлнэ:

- Монгол Улсын Үндсэн хууль;
- Монгол Улсын Засгийн газрын тухай хууль;
- Монгол Улсын Засаг захиргаа, нутаг дэвсгэрийн нэгж, түүний удирдлагын тухай хууль;
- Монгол Улсын Төрийн албаны тухай хууль;
- Ашигт малтмалын тухай хууль;
- Газрын хэвлийн тухай хууль;

- Гадаадын хөрөнгө оруулалтын тухай хууль;
- Газрын тосны тухай хууль;
- Гадаадын зээл, тусламжийг зохицуулах тухай хууль;
- Чөлөөт бүсийн эрх зүйн байдлын тухай хууль;
- "Алтанбулаг" худалдааны чөлөөт бүсийн эрх зүйн байдлын тухай хууль;
- "Замын-Үүд" эдийн засгийн чөлөөт бүсийн эрх зүйн байдлын тухай хууль;
- "Цагааннуур" худалдааны чөлөөт бүсийн эрх зүйн байдлын тухай хууль;
- Үйлдвэрлэл, технологийн парк байгуулж, хөгжүүлэх үндсэн чиглэл;
- Дэлхийн худалдааны байгууллагын олон талт худалдааны хэлэлцээний Урагвай, Доха, Канкуны үе шатны дүнд байгуулсан эрх зүйн баримт бичгүүд;
- Засгийн газрын үйл ажиллагааны хөтөлбөр;
- Бусад хууль тогтоомж.

1.4. Арга зүй

Хөтөлбөрийг боловсруулахад олон улсын туршлага, өөрчлөлтийн удирдлага, үйл ажиллагаа /бизнес/-ны төлөвлөлт болон дахин инженерчлэл, байгууллагын өөрчлөлтийн аргачлал зэрэг арга зүйг хэрэглэв.


1.5. Чиглэлийн яамны үүрэг, хариуцлагын ерөнхий хуваарь

Үйлдвэр, худалдааны яам нь Засгийн газрын үйл ажиллагааны стратегийг хэрэгжүүлэх талаар үүрэг хариуцлага хүлээж Үйлдвэр, худалдааны сайд, дэд сайд, Засгийн газрын Танхимд бүх талын зөвлөлгөө, дэмжлэг үзүүлнэ. Үйлдвэр, худалдааны яам нь Засгийн газрын стратегийн бодлоготой уялдуулан салбарын бодлого, төлөвлөлт болон төсвийн зарцуулалтын тэнцвэр, харилцан уялдаа холбоог хангах асуудалд Засгийн газар, яамны өндөрлөгөөс өргөн хүрээтэй хандаж, зөв зохистой удирдахад анхаарлаа төвлөрүүлнэ. Засгийн газрын зорилт, чиг үүргийг хэрэгжүүлэх үүрэг бүхий чиглэлийн яамдын нэг болох Үйлдвэр, худалдааны яам нь Засгийн газрын үйлдвэр, худалдааны зөвлөхийн үүрэг, хариуцлагыг хүлээнэ.

1.6. Стратегийн удирдлага, зохицуулалтын хэрэгцээний эх үүсвэр

Энэ хэрэгцээний эх үүсвэрт дор дурдсан үйлчлүүлэгч буюу хэрэглэгч хамрагдана:

ҮЙЛДВЭР, ХУДАЛДААНЫ ЯАМНЫ СТРАТЕГИЙН УДИРДЛАГА,
ЗОХИЦУУЛАЛТЫН ХЭРЭГЦЭЭНИЙ ЭХ ҮҮСВЭР



Үйлдвэр, худалдааны яамны үндсэн үйлчлүүлэгч буюу хэрэглэгч нь Үйлдвэр, худалдааны сайд, Засгийн газрын Танхим байна. Үйлдвэр, худалдааны яамны стратегийн удирдлага, зохицуулалт нь дээр дурдсан хэрэгцээний эх үүсвэр, ялангуяа үндсэн үйлчлүүлэгч буюу хэрэглэгчийн эрэлт хэрэгцээг хангахтай холбогдон үүсэх харилцааг зохицуулахад чиглэнэ. Үйлдвэр, худалдааны яамны стратегийн удирдлага, зохицуулалтын хэрэгцээг хангах үйлчилгээний хүрээ, төрөл, хэлбэрийг

хэрэгцээний эх үүсвэр бүрээр тогтоон тус яамны зохион байгуулалтын бүтцийн нэгжүүдийн зорилт, чиг үүрэг, төрийн албан хаагчдын ажлын байр /албан тушаал/-ны тодорхойлолтод нарийвчлан тусгаж хэрэгжүүлнэ.

2. Үйлдвэр, худалдааны яамны үйл ажиллагааны стратеги

2.1. Үйл ажиллагааны стратегийн мөн чанар

Үйлдвэр, худалдааны яамны үйл ажиллагааны стратегийн мөн чанар нь Засгийн газрын үйл ажиллагааны тэргүүлэх чиглэл, Засгийн газрын үйл ажиллагааны хөтөлбөр, Үйлдвэр, худалдааны сайдын эрхлэх асуудлын хүрээний зорилт, чиг үүргийг хэрэгжүүлэхэд чиглэсэн Үйлдвэр, худалдааны сайдын үйл ажиллагаанд өндөр мэргэшлийн, цаг үеэ олсон, шуурхай зөвлөлгөө, бүх талын дэмжлэг үзүүлэхэд оршино.

2.2. Үйл ажиллагааны тэргүүлэх чиглэл

Үйлдвэр, худалдааны яам нь дор дурдсан үйл ажиллагааны тэргүүлэх чиглэлтэй ажиллана:

2.2.1. Жижиг, дунд үйлдвэр, жижиг бизнесийг дэмжин хөгжүүлэх;

2.2.2. Үйлдвэрлэлийн технологийг шинэчлэх, дэлхийн тэргүүний техник, технологийг нутагшуулах замаар экспортын баримжаатай үндэсний үйлдвэрлэлийг хөгжүүлэх;

2.2.3. Гадаад худалдааг хөгжүүлэх, гадаадын хөрөнгө оруулалтыг дэмжих;

2.2.4. Худалдаа, эдийн засгийн чөлөөт бүсүүд, үйлдвэрлэл, технологийн паркийг хөгжүүлэх;

2.2.5. Бүтээгдэхүүн, үйлчилгээний дэлхийн зах зээлд өрсөлдөх чадварыг сайжруулж экспортыг нэмэгдүүлэх, импортын болон эх орны үйлдвэрийн бараа, түүхий эдийн бөөний худалдааны сүлжээг бүс нутгийн хөгжлийн үзэл баримтлалд нийцүүлэн алслагдсан хэрэглэгчдийг хангахад чиглүүлэн байгуулах;

2.2.6. Нутаг дэвсгэрийн геологийн судалгааны үр дүнд ашигт малтмал, газрын тосны ордын байршлын зүй тогтлыг тодорхойлох, улс орны эдийн засгийн хөгжлийн бодлого, зах

зээлийн эрэлт хэрэгцээтэй уялдуулан ашигт малтмалын ордын нөөц өсгөх болон орд газрыг дэвшилтэт технологиор ашиглах;

2.2.7. Эдийн засгийн хамтын ажиллагааг хөгжүүлэх, гадаадын зээл, тусламжийг зохицуулах.

2.3. Үйл ажиллагааны эрхэм зорилго

Үйлдвэр, худалдааны яамны үйл ажиллагааны эрхэм зорилго нь үйлдвэр, худалдаа, эрдэс баялаг, уул уурхайн үйлдвэрлэлийн салбарын эрх зүй, бизнесийн таатай орчинг бүрдүүлж, үйлдвэрлэл, худалдааны өсөлтийг хангахад оршино.

2.4. Үйл ажиллагааны стратегийн зорилт

Үйлдвэр, худалдааны яам нь эрхэм зорилгынхоо хүрээнд үйл ажиллагааны стратегийн дор дурдсан зорилтыг хэрэгжүүлнэ:

2.4.1. Эдийн засгийн хөгжлийн нэгдсэн бодлого, стратегийн төлөвлөлтийг боловсронгуй болгох, хөрөнгө оруулалтын болон төслийн зээлийн санал боловсруулах, бодлогын удирдамжаар хангах;

2.4.2. Үйлдвэрийн салбарын ойрын болон хэтийн төлөв, хөгжлийн бодлого, стратеги, хөтөлбөр, төсөл боловсруулах, бодлогын хэрэгжилтийг зохицуулах;

2.4.3. Худалдаа, гадаад эдийн засгийн хамтын ажиллагааны бодлого, стратеги, хөтөлбөр, төсөл боловсруулах, бодлогын хэрэгжилтийг зохицуулах;

2.4.4. Уул уурхай, эрдэс баялгийн салбарын ойрын болон хэтийн бодлого, стратеги, хөтөлбөр, төсөл боловсруулах, хэрэгжилтийг зохицуулах;

2.4.5. Төрийн захиргааны удирдлагын манлайлал, хүний нөөцийн удирдлагаар хангах, салбарын бодлогын хэрэгжилтийн явц байдалд хяналт-шинжилгээ хийх, үнэлгээ өгөх.

2.5. Үйл ажиллагааны гол зорилт

Үйлдвэр, худалдааны яамны стратегийн зорилт тус бүрийн хүрээнд тэдгээрийг хэрэгжүүлэхэд чиглэсэн үйл ажиллагааны дор дурдсан гол зорилтыг дэвшүүлэн ажиллана:

2.5.1. Үйл ажиллагааны стратегийн 1 дүгээр зорилтын хүрээнд:

2.5.1.1. Эдийн засгийн хөгжил, бизнесийн таатай орчинг бүрдүүлэх нэгдсэн бодлого, стратеги төлөвлөлтийг боловсронгуй болгох, бодлогын удирдамжаар хангах;

2.5.1.2. Эдийн засгийн хөгжлийн загварчлал, хөрөнгө оруулалтын болон төслийн зээл, лизингийн үйлчилгээ, ноу-хау, шинэ технологи зэрэг бодлого, төслийн санал боловсруулах, сонирхогч талд дэмжлэг туслалцаа үзүүлэх;

2.5.1.3. Бүс нутгийн болон олон улсын хамтын ажиллагаанд Монгол Улсын оролцох бодлого, чиглэлийг боловсруулахад дэмжлэг үзүүлэх.

2.5.2. Үйл ажиллагааны стратегийн 2 дугаар зорилтын хүрээнд:

2.5.2.1. Үндэсний үйлдвэрлэлийг хөгжүүлэх, жижиг, дунд үйлдвэр, жижиг бизнес хөгжих таатай орчинг бүрдүүлэхэд чиглэсэн бодлого, стратеги, хөтөлбөр, төсөл боловсруулах, бодлогын удирдамжаар хангах;

2.5.2.2. Салбарын бодлого, хөтөлбөр, төсөл, үйлдвэрлэлийг бүсчилэн хөгжүүлэх, үйлдвэрлэл технологийн парк байгуулах, үйлдвэрлэлийн технологи шинэчлэлийн хэрэгжилтийг зохион байгуулах, зохицуулах;

2.5.2.3. Жижиг, дунд үйлдвэр, технологийн хөгжлийг дэмжих.

2.5.3. Үйл ажиллагааны стратегийн 3 дугаар зорилтын хүрээнд:

2.5.3.1. Худалдаа, эдийн засгийн хамтын ажиллагааны бодлого, стратеги, хөтөлбөр, төсөл боловсруулах, бодлогын удирдамжаар хангах;

2.5.3.2. Худалдаа, эдийн засгийн салбарын бодлого, хөтөлбөр, төслийн хэрэгжилтийг зохион байгуулах, зохицуулах;

2.5.3.3. Дэлхийн худалдааны байгууллагын гэрээ, хэлэлцээрээр хүлээсэн үүргийг биелүүлэх, хоёр болон олон талт

худалдаа, хамтын ажиллагааны хэлэлцээр байгуулах, хэрэгжүүлэхэд дэмжлэг туслалцаа үзүүлэх.

2.5.4 Үйл ажиллагааны стратегийн 4 дүгээр зорилтын хүрээнд:

2.5.4.1. Геологи, уул уурхайн үйлдвэрлэлийг хөгжүүлэх, гадаадын хөрөнгө оруулалтыг нэмэгдүүлэхэд чиглэсэн бодлого, стратеги, хөтөлбөр, төсөл боловсруулах, бодлогын удирдамжаар хангах;

2.5.4.2. Салбарын хууль тогтоомж, бодлого, хөтөлбөр, төслийн хэрэгжилтийг зохион байгуулах.

2.5.5. Үйл ажиллагааны стратегийн 5 дугаар зорилтын хүрээнд:

2.5.5.1. Төрийн захиргааны болон хүний нөөцийн удирдлагын манлайллыг хангах;

2.5.5.2. Салбарын бодлого, хөтөлбөр, төсөл, арга хэмжээний хэрэгжилтэд хяналт-шинжилгээ хийх, үр дүнд үнэлгээ өгөх;

2.5.5.3. Төсвийн ерөнхийлэн захирагчийн төсөв, санхүүгийн үр ашгийг дээшлүүлэх.


2.6. Үйл ажиллагааны зорилт

Үйлдвэр, худалдааны яамны үйл ажиллагааны гол зорилт тус бүрийн хүрээнд тэдгээрийг хэрэгжүүлэхэд чиглэсэн үйл ажиллагааны чиглэлүүдийг тус яам тодорхойлж хэрэгжүүлнэ.

2.7. Үйл ажиллагааны стратегийн загвар

Үйлдвэр, худалдааны яамны үйл ажиллагаа /бизнес/-ны стратегийн загварыг дор дурдсанаар тодорхойлж байна:

**ҮЙЛДВЭР, ХУДАЛДААНЫ ЯАМНЫ ҮЙЛ
АЖИЛЛАГАА /БИЗНЕС/-НЫ СТРАТЕГИЙН ЗАГВАР**



3. Үйлдвэр, худалдааны яамны үйл ажиллагааны бүтцийн ерөнхий тогтолцоо, зохион байгуулалтын бүтэц, тэдгээрийн үндсэн үүрэг, чиг үүрэг

3.1. Бүтцийн ерөнхий тогтолцоо боловсруулахад баримтлах зарчим

Үйлдвэр, худалдааны яамны үйл ажиллагааны бүтцийн ерөнхий тогтолцоо, санал болгож буй зохион байгуулалтын бүтцийг боловсруулахад дор дурдсан зарчмыг баримтлав:

а/Засгийн газрын үйл ажиллагааны стратегитай уялдуулан яамны үйл ажиллагааны стратегийг тусгасан байх зарчим;

б/эрх мэдлийн ялгаа, зааг нь тодорхой, итгэл хүлээхүйц байх зарчим;

в/үзэгдэхүйц үйлчилгээний болон стратегийн удирдлагын баримжаатай байх зарчим;

г/бүтцийн хувьд энгийн байх зарчим;

д/тэнцвэрийг хангах, хяналтын хүрээг тогтоох зарчим;


е/улс төрийн хувьд төвийг сахисан байх зарчим;

з/хангалттай чадавхи, бодитой үйл ажиллагааны зарчим.

3.2. Үйл ажиллагааны бүтцийн ерөнхий тогтолцооны загвар

Дээр дурдсан зарчим болон Үйлдвэр, худалдааны яамны үйл ажиллагаа /бизнес/-ны стратегийн загварыг үндэслэн тус яамны үйл ажиллагааны бүтцийн дор дурдсан ерөнхий тогтолцооны загварыг санал болгож байна:

**Үйлдвэр, худалдааны яамны үйл ажиллагааны бүтцийн
ерөнхий тогтолцооны загвар**



3.3. Зохион байгуулалтын бүтэц

Үйлдвэр, худалдааны яамны үйл ажиллагаа /бизнес/-ны стратегийн болон бүтцийн ерөнхий тогтолцооны загварт үндэслэн тус яам зохион байгуулалтын бүтцийн дор дурдсан нэгжүүдтэй байна:

3.3.1. Нэгдсэн бодлого, стратегийн төлөвлөлтийн асуудал эрхэлсэн зохион байгуулалтын бүтцийн нэгж, түүний үндсэн үүрэг, чиг үүрэг

Энэ нэгж нь үйл ажиллагааны стратегийн 1 дүгээр зорилтын хүрээнд эдийн засгийн хөгжил, бизнесийн таатай орчинг бүрдүүлэх нэгдсэн бодлого, стратеги, төлөвлөгөө, төслийн баримт бичиг, эдийн засгийн загварчлал, хөрөнгө оруулалтын болон төслийн зээл, лизингийн үйлчилгээ, ноу хау, шинэ технологийн санал, бүс нутгийн болон олон улсын хамтын ажиллагаанд Монгол Улсын оролцох бодлого, чиглэлийг боловсруулах, тэдгээртэй холбогдсон судалгаа, шинжилгээ хийх, үнэлэлт, дүгнэлт өгөх, техник эдийн засгийн үндэслэл гаргах, шинжээчийн дүгнэлт, хөндлөнгийн үнэлгээ хийлгэх зэрэг чиг үүргийг хэрэгжүүлнэ.

Энэ нэгжийн үйл ажиллагаа нь Үйлдвэр, худалдааны сайд, дэд сайд, Засгийн газрын Танхимын үйл ажиллагааны үр нөлөө, үр ашгийг дээшлүүлэхэд чиглэнэ. Энэ нь Үйлдвэр, худалдааны сайдаас стратегийн төлөвлөлт, бодлогын удирдамжаар хангах, зохицуулахтай холбогдсон шийдвэр боловсруулан гаргах

механизмд дэмжлэг үзүүлэх, сайд, дэд сайд болон яамны Төрийн нарийн бичгийн дарга, яамны зохион байгуулалтын нэгжийг шаардлагатай мэдээлэл, өндөр мэргэшлийн, цаг үеэ олсон, шуурхай зөвлөлгөө, үйлчилгээ, бүх талын дэмжлэгээр хангах замаар хэрэгжинэ.

Энэ нэгжээс үзүүлэх үйлчилгээний үндсэн хэрэглэгч нь Үйлдвэр, худалдааны сайд, дэд сайд, яамны Төрийн нарийн бичгийн дарга байх бөгөөд шууд бус хэлбэрээр энэ үйлчилгээг хэрэглэгч нь Сангийн яам, Зээл, тусламжийг зохицуулах зөвлөл, бусад яам, нутгийн захиргааны байгууллага, аж ахуйн нэгж байна. Энэ үйлчилгээг үзүүлэхэд оролцох гол түнш нь Сангийн яам, Гадаад хэргийн яам, Хүнс, хөдөө аж ахуйн яам, Барилга, хот байгуулалтын яам, нийслэлийн Засаг даргын Тамгын газар, арилжааны банк байна.

3.3.2. Үйлдвэрийн бодлого зохицуулалтын асуудал эрхэлсэн зохион байгуулалтын бүтцийн нэгж, түүний үндсэн үүрэг, чиг үүрэг

Энэ нэгж нь үйл ажиллагааны стратегийн 2 дугаар зорилтын хүрээнд үндэсний үйлдвэрлэлийг хөгжүүлэх, жижиг бизнес хөгжих таатай орчинг бүрдүүлэхэд чиглэсэн бодлого, стратеги, хөтөлбөр, төсөл боловсруулах, бодлогын удирдамжаар хангах, бодлогын хэрэгжилтийг зохион байгуулах, зохицуулах зэрэг үндсэн чиг үүргийг хэрэгжүүлнэ. Мөн жижиг, дунд үйлдвэр, технологийн хөгжлийг дэмжих чиглэлээрх хөтөлбөр, төслийг хэрэгжүүлэх үйл ажиллагааг зохион байгуулах, зохицуулах, шинэ техник, технологи нэвтрүүлэх, жижиг, дунд үйлдвэр хөгжих орчин бүрдүүлэх зэрэг чиг үүргийг хэрэгжүүлнэ.

Энэ нэгжийн үйл ажиллагаа нь Үйлдвэр, худалдааны сайд, дэд сайд, Засгийн газрын Танхимын үйл ажиллагааны үр нөлөө, үр ашгийг дээшлүүлэхэд чиглэнэ. Энэ нь Үйлдвэр, худалдааны сайд, дэд сайд, Засгийн газрын Танхимын стратегийн төлөвлөлт, бодлогын удирдамжаар хангахтай холбогдсон шийдвэр гаргах механизмд дэмжлэг үзүүлэх, үндэсний үйлдвэрийг тогтвортой хөгжүүлэх, эдийн засгийн өсөлтийг хангах, хүн амын хэрэглээг хангах, экспортыг нэмэгдүүлэх, жижиг, дунд үйлдвэрлэлийг дэмжин хөгжүүлэхэд Үйлдвэр, худалдааны сайдыг шаардлагатай мэдээлэл, өндөр мэргэшлийн цаг үеэ олсон, шуурхай зөвлөлгөө, үйлчилгээ, бүх талын дэмжлэгээр хангах замаар хэрэгжинэ.

Энэ нэгжээс үзүүлэх үйлчилгээний үндсэн хэрэглэгч нь Үйлдвэр, худалдааны сайд, дэд сайд, яамны Төрийн нарийн бичгийн дарга, Засгийн газрын Танхим байх бөгөөд шууд бус хэлбэрээр энэ үйлчилгээг хэрэглэгч нь бусад яам, орон нутгийн захиргааны байгууллага, төрийн өмчийн болон хувийн аж ахуйн

нэгж, иргэд байна. Энэ үйлчилгээг үзүүлэхэд оролцох гол түнш нь Сангийн яам, Засгийн газрын Хэрэг эрхлэх газар, бүх шатны Засаг дарга нар, тэдгээрийн Тамгын газар байна.

3.3.3. Худалдаа, эдийн засгийн хамтын ажиллагааны бодлого зохицуулалтын асуудал эрхэлсэн зохион байгуулалтын нэгж, түүний үндсэн үүрэг, чиг үүрэг

Энэ нэгж нь үйл ажиллагааны стратегийн 3 дугаар зорилтын хүрээнд худалдаа, эдийн засгийн хамтын ажиллагааны бодлого, стратеги, хөтөлбөр, төсөл боловсруулах, бодлогын удирдамжаар хангах, энэ салбарын бодлого, хөтөлбөр, төслийн хэрэгжилтийг зохион байгуулах, зохицуулах, Дэлхийн худалдааны байгууллагын гэрээ, хэлэлцээрээр хүлээсэн үүргийг биелүүлэх, хоёр болон олон талт худалдаа, хамтын ажиллагааны гэрээ, хэлэлцээр байгуулах, хэрэгжүүлэхэд дэмжлэг, туслалцаа үзүүлэх зэрэг үндсэн чиг үүргийг хэрэгжүүлнэ. Мөн гадаадын хөрөнгө оруулах бодлого чиглэлийг тодорхойлох, хамтын ажиллагааны хөтөлбөр, төсөл боловсруулах, түүнийг хэрэгжүүлэх, эдийн засаг, худалдааны чөлөөт бүс байгуулж хөгжүүлэх, дотоод худалдаа, түүхий эд бэлтгэлийн оновчтой сүлжээ байгуулах, үйлдвэрлэл, өргөн хэрэглээний барааны хангамжийг сайжруулах зэрэг бодлого, үйл ажиллагааг уялдуулан зохицуулах чиг үүргийг хэрэгжүүлнэ.

Энэ нэгжийн үйл ажиллагаа нь Үйлдвэр, худалдааны сайд, дэд сайд, Засгийн газрын Танхимын үйл ажиллагааны үр нөлөө, үр ашгийг дээшлүүлэхэд чиглэнэ. Энэ нь Үйлдвэр, худалдааны сайд, дэд сайд, Засгийн газрын танхимын стратегийн төлөвлөлт, бодлогын удирдамжаар хангахтай холбогдсон шийдвэр гаргах механизмд дэмжлэг үзүүлэх, худалдаа, хамтын ажиллагааг хөгжүүлэхэд Үйлдвэр, худалдааны сайдыг шаардлагатай мэдээлэл, өндөр мэргэжлийн цаг үеэ олсон, шуурхай зөвлөлгөө, үйлчилгээ, бүх талын дэмжлэгээр хангах замаар хэрэгжинэ.

Энэ нэгжээс үзүүлэх үйлчилгээний үндсэн хэрэглэгч нь Үйлдвэр, худалдааны сайд, дэд сайд, яамны Төрийн нарийн бичгийн дарга, Засгийн газрын Танхим байх бөгөөд шууд бус хэлбэрээр энэ үйлчилгээг хэрэглэгч нь бусад яам, Дэлхийн худалдааны байгууллага, гадаад оронд суугаа Элчин сайдын яамны эдийн засгийн зөвлөх, худалдааны төлөөлөгч, төрийн өмчийн болон хувийн аж ахуйн нэгж байна. Энэ үйлчилгээг үзүүлэхэд оролцох гол түнш нь Гадаад хэргийн яам, Сангийн яам, Засгийн газрын Хэрэг эрхлэх газар, бүх шатны Засаг дарга нар, тэдгээрийн Тамгын газар байна.

3.3.4. Геологи, уул уурхайн бодлого зохицуулалтын асуудал эрхэлсэн зохион байгуулалтын бүтцийн нэгж, түүний үндсэн үүрэг, чиг үүрэг

Энэ нэгж нь үйл ажиллагааны стратегийн 4 дүгээр зорилтын хүрээнд геологи, уул уурхайн үйлдвэрлэлийг хөгжүүлэх, тус салбарт гадаадын хөрөнгө оруулалтыг нэмэгдүүлэхэд чиглэсэн бодлого, стратеги, хөтөлбөр, төсөл боловсруулах, бодлогын удирдамжаар хангах, салбарын хууль тогтоомж, бодлого, хөтөлбөр, төслийн хэрэгжилтийг зохион байгуулах, нутаг дэвсгэрийн геологийн судалгаа, ашигт малтмал, газрын тосны эрэл хайгуулыг төсвийн хөрөнгө, гадаад, дотоодын хөрөнгө оруулалтаар хийх, нөөц өсгөх, шинэ дэвшилт технологи, арга аргачлал нэвтрүүлэх, ашигт малтмал, газрын тосны ордыг олборлох, боловсруулах, гүн боловсруулах, газрыг нөхөн сэргээх, энэ салбарт гадаадын хөрөнгө оруулалтыг дэмжих зэрэг чиг үүргийг хэрэгжүүлнэ.

Энэ нэгжийн үйл ажиллагаа нь Үйлдвэр, худалдааны сайд, дэд сайд, Засгийн газрын Танхимын үйл ажиллагааны үр нөлөө, үр ашгийг дээшлүүлэхэд чиглэнэ. Энэ нь Үйлдвэр, худалдааны сайд, дэд сайд, Засгийн газрын Танхимын стратегийн төлөвлөлт, бодлогын удирдамжаар хангахтай холбогдсон шийдвэр гаргах механизмд дэмжлэг үзүүлэх, Үйлдвэр, худалдааны сайдыг шаардлагатай мэдээлэл, өндөр мэргэжлийн цаг үеэ олсон, шуурхай зөвлөлгөө, үйлчилгээ, бүх талын дэмжлэгээр хангах замаар хэрэгжинэ.

Энэ нэгжээс үзүүлэх үйлчилгээний үндсэн хэрэглэгч нь Үйлдвэр, худалдааны сайд, дэд сайд, яамны Төрийн нарийн бичгийн дарга байх бөгөөд шууд бус хэлбэрээр энэ үйлчилгээг хэрэглэгч нь бусад яам, ашигт малтмал, газрын тосны асуудал эрхэлсэн агентлаг, орон нутгийн захиргааны байгууллага, төрийн өмчийн болон хувийн аж ахуйн нэгж байна. Энэ үйлчилгээг үзүүлэхэд оролцох гол түнш нь Сангийн яам, Байгаль орчны яам, Түлш, эрчим хүчний яам, Засгийн газрын Хэрэг эрхлэх газар, ашигт малтмал, газрын тосны асуудал эрхэлсэн агентлаг, бүх шатны Засаг дарга нар, тэдгээрийн Тамгын газар байна.

3.3.5. Төрийн захиргааны удирдлагын асуудал эрхэлсэн зохион байгуулалтын бүтцийн нэгж, түүний үндсэн үүрэг, чиг үүрэг

Энэ нэгж нь үйл ажиллагааны стратегийн 5 дугаар зорилтын хүрээнд төрийн захиргааны болон хүний нөөцийн удирдлагын манлайллыг хангах үндсэн үүргийг хүлээж, яамны үйл ажиллагаанд удирдлагын шилдэг тэргүүний туршлага, арга барилыг нэвтрүүлэх, хууль зүйн зөвлөлгөө өгөх, яамны дотоод

төлөвлөлт, хяналт, ажлаа тайлагнах зэрэг чиг үүргийг хэрэгжүүлнэ. Мөн салбарын мэдээллийн сүлжээ бий болгох, сайд болон яамны үйл ажиллагааг мэдээлэх, сурталчлах, бодлого, хөтөлбөр, төсөл, арга хэмжээний хэрэгжилтэд хяналт-шинжилгээ хийх, үнэлгээ өгөх, хууль тогтоомж, бодлогын хэрэгжилтийг нэгтгэн дүгнэж тайлагнах чиг үүргийг хэрэгжүүлнэ. Төсвийн ерөнхийлөн захирагчийн төсвийг төлөвлөх, зарцуулалтад дотоодын хяналт тавих, яамны хэвийн үйл ажиллагааны нөхцөлийг хангах чиг үүрэг хамаарна.

Энэ нэгжийн үйл ажиллагаа нь Үйлдвэр, худалдааны сайд, дэд сайд, яамны Төрийн нарийн бичгийн даргад болон яамны аппаратад шийдвэр боловсруулан гаргах, хэрэгжүүлэхэд эрх зүйн болон дотоод үйлчилгээ үзүүлэх, шаардлагатай мэдээлэл, зөвлөлгөө, дэмжлэгээр хангах, тэргүүний арга барил, туршлагыг нэвтрүүлэх, ажиллагчдын үйл ажиллагаа, мэргэшлийн түвшинг нь үнэлж дүгнэх, ажиллах нөхцөл, ёслол, протоколын үйл ажиллагаа эрхлэх, салбарын мэдээллийн сүлжээ байгуулах, мэдээллийн сан бүрдүүлэх, хэрэглэгчдийг мэдээллээр хангах замаар хэрэгжинэ.

Энэ нэгжээс үзүүлэх үйлчилгээний үндсэн хэрэглэгч нь Үйлдвэр, худалдааны сайд, дэд сайд, яамны Төрийн нарийн бичгийн дарга, зохион байгуулалтын бүтцийн нэгжүүд, төрийн захиргааны албан хаагчид байх бөгөөд шууд бус хэлбэрээр энэ үйлчилгээг хэрэглэгч нь Засгийн газрын агентлаг, аж ахуйн нэгж, бусад хэрэглэгч байна. Энэ нэгжийн үйлчилгээг үзүүлэхэд оролцох гол түнш нь Засгийн газрын Хэрэг эрхлэх газар, Хууль зүй, дотоод хэргийн яам, бусад яам, Засгийн газрын агентлаг, иргэд байна.

---oOo---